



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

## ***Komunikadu Imprensa***

4 Outubru 2012

### **Tribunál Distritál Dili julga membro milísia Besi Merah Putih 1999 husi Ulmera-Liquiça**

Iha loron 3 Outubru 2012, Tribunál Distritál Dili dala ida tan julga autór krime grave 1999 hamutuk na'in 3 ho inisiál FF, SdJ, no MS. Arguidu sira akuza komete krime kontra umanidade iha Setembru 1999 iha Ulmera Liquiça.

Ministériu Públiku akuza katak arguidu sira envolve iha grupu Milisia Besi Merah Putih (BMP) hodi hakotu vítima Francisco Braz no Felix Barreto nia vida. Ministériu Públiku dehan katak arguidu sira prátika krime kontra umanidade ne'e depois rona rezultadu referendu 1999 ne'ebé hatudu maioria povu Timor-Leste hili ukun rasik aan. Kazu ida ne'e rejista ho Númeru Prosesu : 282/C.Ord/2012/TDD.

Agenda julgamentu ba kazu ida ne'e adia dala tolu durante ne'e, tanba arguidu ida ho inisiál SdJ la kumpri notifikasaun husi Tribunál Distritál Dili. Ikus mai tribunál hasai mandadu kapturasaun hodi kaptura arguidu SdJ hodi kumpri prizaun preventive iha Prizaun Becora hodi submete ba prosesu julgamentu.

*“Tribunál hatudu komitmentu atu julga kazu krime grave ne'ebé akontese iha tinan 1999 depoisde Referendu. Nune'é husu ba parte hotu-hotu atu koopera ho tribunál hodi bele hetan rezultadu di'ak ba kazu hasoru umanidade iha tempu pasadu,”* dehan Luis de Oliveira Sampaio, Diretór Ezekutivu JSMP.

Iha tribunál nia oin, arguidu na'in 3 rejista maka'as akuzasaun husi Ministériu Públiku. Sira deklara katak sira la ameasa ema ruma, no la oho vítima na'in 2. Arguidu sira deklara katak vítima na'in 2 mate tanba militar Indonezia mak tiru. Maski nune'e arguidu ho inisiál MS konfesa katak nia mak sunu uma.

Tuir akuzasaun, pozisaun arguidu na'in tolu iha BMP iha tinan 1999 hanesan tuir mai: arguidu inisiál FF iha 1999 nu'udar xefe suku nomós komandante jerál BMP iha Suku Ulmera-Liquiça; arguidu na'in rua ho inisiál SdJ no FB nu'udar komandante seksaun iha Kasaid.

*“JSMP espera katak kazu krime grave sira sei kontinua julga atu bele hetan verdade no hatudu duni ba ema hotu-hotu katak justisa la’o duni iha nasaun direitu demokrátiku foun ida ne’e, liuliu atu fó justisa ba vítima no família vítima ne’ebé hetan sofrémentu husi hahalok dezumanu iha pasadu,”* tenik Luis de Oliveira Sampaio, Diretór Ezekutivu JSMP.

Julgamentu dirije ho juiz koletivu, Dra. Ana Paula Fonseca, Dr. Paulo Texeira no Dr. Julião Quintas. Ministériu Públiku representa husi Dr. José Landim no Defensória Públiku representa husi Dr. José da Silva.

Julgamentu ba kazu ida ne’e sei hala’o lora-lora husi 4-12 Outubru 2012.

Atu hetan informasaun klean favór kontaktudireitamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883